

Spiralilersuisimanermik suliami arnanut eqqugaasunut taarsiissuteqarnissamut allaffissornermut tunngavissaq

Taarsiissuteqarnissamut tunngaviusoq aamma aningaasat taarsiissutigineqartussat

Kalaallinut arnanut akuersissuteqarnatik imaluunniit ilisimanngisaminnik piffissami 1960-1991-ip akornanni naartunaveersaaserneqarsimasunut taarsiissuteqartoqarsinnaavoq. Aningaasat taarsiissutigineqartussat arnamut ataatsimut 300.000 kr.-upput. Aningaasat taarsiissutigineqartussat akileraarutitaqassanngillat aammalu ukiumut iluarsiiqqineqartassanngillat. Pisortanit pilersuinnermut tapiissutsinit imaluunniit pisortanit tapiissutit sinnerinut taarsiiffigitinnermi ilanngaateqartoqassanngilaq, taamatullu taarsiissutit akiligassaqaartitsisunit malersorneqarnissamut illersorneqassallutik.

Taarsiiffiqineqarsinnaasoq taarsiiffiqineqarnissamik qinnuteqarsimappat, aalajangiisoqannginneranili toqusimaguni, kingornussisussaataitaasut taarsiiffiqineqartussap inaanut pisinnaatitaassapput. Taarsiissuteqarnermut aaqqiissut kajumissutsimik eqqartuussivinnut taarsiullugu toqqagassaavoq, tamannalu ataasiakkaanut eqqartuussivinni piumasaqarnissamut akornutaanngilaq. Taarsiissutigineqartussat pissutsinut assinginut taarsiissutissaasinnaasunut nalimmassarneqassapput.

Taarsiiffiqineqarnissamut piumasaqaatit

Arnap taarsiiffiqineqarsinnaaneranut tunngaviusumik piumasaqaatit pingasuupput:

1. Arnaq Kalaallit Nunaanni piffissami 1960-1991-imi najugaqarsimassaaq
2. Arnaq sapinngisamik eqqaamasani naapertorlugu Kalaallit Nunaanni imaluunniit Danmarkimi kostskolernermini imaluunniit efterskolernermini akuersissuteqaaqaarnani imaluunniit ilisimatinneqarnani piffissami 1960-1991-ip akornanni naartunaveersaaserneqarsimalluni nalunaaruteqassaaq.
3. Arnap pisimasoq uppersarsassavaa, ass. tutsuiginartumik nalunaaruteqarnikkut. Nalaatat naapertorlugit nalunaaruteqarneq naammassinnaassaaq.

Taarsiiffiqineqarnissamut qinnuteqaat qinnuteqarnermi immersugassamik piumasaqaataasumik immersuinikkut Patienterstatningenimut tunniussinikkut pissaaq, taanna qulaani taakkartorneqartunik nakkutilliivoq, tak. ataani paasisaqarnerusinnaavutit. Qinnuteqarnermut immersugassaq qinnuteqartumit imaluunniit tassunga oqaasissaqartitamit/piginnaatitsisummit tigummisumit immersorneqarsinnaavoq. Qinnuteqarnermi immersugassaq qallunaatut aamma kalaallisut pissarsiarineqarsinnaassaaq aammalu piffissami april 2025-mit aamma 1. juni 2028-p akornanni tunniunneqarsinnaanissaa naatsorsuutigineqarpoq. Qinnuteqarnermili suliat taarsiissuteqarnissamut aaqqiissummut tunngaviusoq aqutissiuunneqareerpat, suliarineqarsinnaalerlutillu aalajangiiffiqineqarsinnaalissapput. Inatsit 1. juni 2026 atulissasoq naatsorsuutigineqarpoq. Aaqqiissut pillugu attaveqarnermut atatillugu tamanna ilitsersuutigineqassaaq.

Piumasaqaatit kinaassusersiunngitsut

Patienterstatningenip qinnuteqaatip misissorneratigut tulluittut CPR-nik nalunaarsuiffimmit aamma/imaluunniit Naalagaaffiup katersugaataanik imaluunniit Nunatta Katersugaasivia Allagaateqarfianilu paasisutissat ilanngullugit tulluittut nakkutigai:

- Qinnuteqartoq arnaava?
- Qinnuteqartoq piffissami qinnuteqarnermi uumasooq nalunaarsorneqarsimava?
- Qinnuteqartoq piffissami 1960-1991-imi Kalaallit Nunaanni najugaqarpa, ilanngullugu Danmarkimi kostskolemi imaluunniit efterskolemiissimava?

Paasisutissanit pissarsiarineqarsinnaasunit qinnuteqartup najugaqarnermut piumasaqaatit naammassineraa nalilerneqarsinnaanngippat, Patienterstatningenip tunngaviusumik qinnuteqartup piffissami 1960-1991-mi Kalaallit

Nunaanni najugaqarnermut imaluunniit Danmarkimi kostskolersimanermut imaluunniit efterskolersimanermut paasissutissaatai tunngavigisinnaavai.

Paasissutissat tunniunneqartut misissorluarneqartariaqartut, Patienterstatningen naliliippat, Patienterstatningenip ass. najugaqarnermut piumasaqaat naammassineqarnerseq nalilerniarlugu uppersarsaatit tulluuttut pissarsiarisinnaassavai: Pisortanit oqartussanit qinnuteqartumut allakkat qinnuteqartup piffissami 1960-1991-mi adressianik allassimasullit, Kalaallit Nunaanni inunngornermut nalunaarsuinermit allagartaq, Kalaallit Nunaanni aamma Danmarkimi atuarfimmut allatsinnerit aamma piffissami 1960-1991-imi akileraartarnermut paasissutissat qinnuteqartup adressianik allassimasortallit.

Ilumoorussilluni nalunaarut

Patienterstatningenip qinnuteqartoq, sapinngisamik eqqaamasani naapertorlugu Kalaallit Nunaanni imaluunniit Danmarkimi kostskolernermini imaluunniit efterskolernermini akuersissuteqaaqarnani imaluunniit ilisimatinneqarnani piffissami 1960-1991-imi naartunaveersaaserneqarsimalluni nalunaaruteqarsimanersaq misissussavai.

Pisumik uppersarsaaneq

Qinnuteqartup pisimasaq uppersarsassavai. Tamanna ass. tutsuignartumik nalunaaruteqarnikkut, qinnuteqaammut ilanngullugu immersorneqarsinnaasumik, apeqqutinik nassuiarneqareersunik arlalinnik kiisalu ilassutissatut paasissutissanik immersuiffissamik imaqtumik pisinnaavoq.

Apeqqutit nassuiarneqareersuni paasissutissat makku allanneqarsinnaapput:

1. Suliffeqarfiup imaluunniit katsorsaaviit akuersissutitaqanngitsumik imaluunniit ilisimatitsinertaqanngitsumik naartunaveersaasersuiffiusimasup taaguutaa.
2. Suliffeqarfiup inissisimaffia (illoqarfik, nunaqarfik, nuna).
3. Pisumi piffissaq.
4. Pisoq pillugu nassuiaat (qanoq pisoqarneranik nassuiaat, aamma akuersissutitaqanngitsumik imaluunniit ilisimatitsinertaqanngitsumik qanoq pisoqarsimanersaq).
5. Qinnuteqartup qanga pasitsassimaneranik imaluunniit qinnuteqartup naartunaveersaaserneqarsimanerminik paasisaqarneranik nassuiaaneq.
6. Pisoq sioqqullugu piffissami tassani sumi najugaqarneq.

Qinnuteqartoq aamma qinnuteqarnermi immersugassamut allakkanik attuumassuteqarsinnaasunik ilanngussinissamut periarfissaqarpoq.

Qinnuteqartup pisoq uppersarsarsimaneraa, Patienterstatningen naliliissaaq. Aalajangersimasumik naliliisoqassaaq, kisianni Patienterstatningen tunngaviumik nalunaarutip tutsuignarnera tunngavigissavai, ass. pisoq pillugu paasissutissanit aalajangersimasunit taparserneqarnerseq, imaluunniit nalaatat naapertorlugit suliami aalajangersimasumi nalunaarut tunullinneqarsinnaanersaq.

Pisup uppersarsarneqarneranik naliliineri Patienterstatningenip aamma ass. allagaatinik paasissutissat, allamit nalunaarutit, allakkat il.il. pingaartissinnaavai, imaluunniit arnaq pisup pinerani sumiiffimmi naartunaveersaartitsiffiusumi najugaqarsimanersaq.

Pisunut assersuutigalugu, qinnuteqaat – qinnuteqaammut nalunaarummik ilanngussisimaneq apeqqutaatinngu – misissorluarneqartariaqarput:

- Arnaq nunami allami Kalaallit Nunaata imaluunniit Danmarkip avataani najugaqarpoq aammalu kalaalerpaluttumik ateqarnani – pingaartumik pisuni, arnaq 1972 sioqqullugu naartunaveersaasersorneqarsimalluni ilisimatitsippat. Arnat piffissami tassani najugaqarnerminik nalunaarsorneqarsimallutik imaluunniit nalunaarsorneqarsimanatik najugaqarsimasut pineqarsinnaammata.
- Inunnik nalunaarsuiffimmit paasissutissanit takuneqarsinnaavoq, qinnuteqartoq meeqqanut anaanaasoq, aammalu qinnuteqartoq naartunaveersaasersuinerup inerani naartusimasaq inunngornerata ullua takutitsivoq.

- Qinnuteqartoq siornatigut taarsiiffigineqarnissamik itigartinneqarsimavoq, ilisimatitsissutigineqartut malillugit pisoq 1958-imi pisimammat aamma kingorna nutaamik qinnuteqaammik nassiussimmat imaluunniit suliap ingerlateqqinnissaanik qinnuteqarmat, pisumut nutaamik taarsiiffigineqarsinnaasumik piffissamik ilisimatitsimmat.
- Qinnuteqartup nalunaarutaa pisoq pillugu paasissutissanik erseqqinnerusunit ilalerneqanngimmat.

Aalajangiineq

Patienterstatningen paasissutissanik qulaani pineqartunik nakkutilleereeruni, Patienterstatningen taarsiissuteqarnissaq pillugu aalajangiissaaq, aalajangiinerlu qinnuteqartumut/oqaasissaqartitamut/piginnaatinneqartumut aamma Indenrigs- og Sundhedsministerietimut nassiullugu. Pisuni qinnuteqaatit kalaallisut tunniunneqarsimappata, aalajangiineq kalaallisuunngortillugu nutserneqassaaq. Patienterstatningenimit taarsiiffigineqarnissamut aalajangiineq oqartussanut allanut maalaarutigineqarsinnaassanngilaq, kisianni eqqartuussivinnut suliaassanngortinneqarsinnaassaaq.

Ingerlanera

Taarsiissuteqarnissamut aaqqiissutip aqunneqarnissaa inatsimmut namminermut tunngaveqarnissaanik pisariaqartitsiffiuvoq. Taarsiissuteqarnissamut aaqqiisummut inatsisissatut siunnersuummik april 2026-mi saqqummiussisoqassaaq, ulloq 1. juni 2026 atulernissaanik siunertaqartumik.

Eqqartuussivimmi suliami maanna ingerlanneqartumi eqqartuutitsiniartunut immikkut ittumik ingerlatsisoqassaaq, taakku taarsiiffigineqarnissamik qinnuteqannginnissaannik tamanna isumaqarpoq, kisianni taarsiiffigineqarnissamut aaqqiisummut piumasaqaatinik naammasinnittut nalilernerqarpat, Indenrigs- og Sundhedsministeriet isumaqatigiissuteqarnissamik neqerooruteqassaaq. Pineqartunut attaveqarneq Naalagaaffiup eqqartuussissuserisua aqqutigalugu eqqartuutitsiniartut eqqartuussissuserisuanut pissaaq.